

OFFICIUM

S. GREGORII VII.

PAPÆ, ET CONFESSORIS.

D U P L E X.

DIE XXV. MAII.

In festo S. Gregorij VII.

Papæ & Confessoris.

Duplex.

Omnia de Communi Confessoris Pontificis, præter ea, quæ hîc habentur propria.

Oratio.

DEus in te sperantium fortitudo, qui beatum Gregorium Confessorem tuum, atque Pontificem, pro tuenda Ecclesiæ libertate virtute constantiæ roborasti: da nobis ejus exemplo, & intercessione, omnia adversantia fortiter superare. Per Dominum nostrum Jesum Christum.

Deinde fit commemorat.

S. Urbani Papæ & martyris.

In primo Nocturno, Lectiones de Scriptura occurrente.

In secundo Nocturno.

Lectio iij.

Gregorius Papa Septimus, antea Hildebrandus Suanæ in Etruria natus, doctrina, Sanctitate,

omniq̄ue virtutum genere cum primis nobilis, mirifice universam Dei illustravit Ecclesiam. Cum parvulus ad fabri ligna edolantis pedes, jam litterarum inscius, luderet, ex rejectis tamen segmentis illa Davidici elementa oraculi: Dominabitur à mari usque ad mare; casu formasse narratur, manum pueri ductante Numine, quo significaretur ejus fore amplissimam in mundo auctoritatem. Romam deinde profectus sub protectione sancti Petri educatus est. Juvenis Ecclesiæ libertatem à laicis oppressam, ac depravatos Ecclesiasticorum mores vehementius dolens, in Cluniacensi Monasterio, ubi sub Régula sancti Benedicti austerioris vitæ observantia eo tempore maxime vigebat, Monachi habitum induens, tanto pietatis ardore Divinæ Majestati deserviebat, ut à Sanctis ejusdem Cœnobij Patribus Prior sit electus,

etus, sed divina providentia majora de eo disponente in salutem plurimorum Cluniaco eductus Hildebrandus, Abbas primum Monasterij sancti Pauli extra muros urbis electus, ac postmodum Romanæ Ecclesiæ Cardinalis creatus, sub Summis Pontificibus, Leone Nono, Victore Secundo, Stephano Nono, Nicolao Secundo, & Alexandro Secundo præcipuis muneribus, & legationibus perfunctus est, Sanctissimi, & purissimi consilij vir à beato Petro Damiani nuncupatus. A Victore Papa Secundo Legatus à latere in Galliam missus, Lugduni Episcopum Simoniacæ labe infectum ad sui criminis confessionem miraculo adëgit. Berengarium in Concilio Turonensi ad iteratam hæresis abjurationem compulit. Cadaloi quoque schisma sua virtute compressit.

✠. Inveni David servum meum, oleo sancto meo unxi eum :
* Manus enim mea auxiliabitur ei. ✠. Nihil proficiet inimicus in eo, & filius iniquitatis non nocëbit ei. Manus enim.

Lectio v.

Mortuo Alexandro Secundo, invitus, & mœrens unanimes omnium consensu, decimo Kalendas Maij, anno Christi millésimo septua-

gésimo tertio, Summus Pontifex electus, sicut Sol effulsit in Domo Dei; nam potens opere, & sermone, Ecclesiasticæ disciplinæ reparandæ, Fidei propagandæ, libertati Ecclesiæ restituendæ, extirpandis erroribus, & corruptelis tanto studio incubuit, ut ex Apostolorum ætate nullus Pontifex fuisse tradatur, qui majores pro Ecclesia Dei labores, molestiasque pertulerit, aut qui pro ejus libertate acrius pugnaverit. Aliquot Provincias à Simoniacæ labe expurgavit. Contra Henrici Imperatoris impios conatus fortis per omnia athleta impavidus permansit, seque pro muro domus Israël ponere non timuit, ac eundem Henricum in profundum malorum prolapsum Fidelium communiõne, regnoque privavit, atque subditos populos fide ei data liberavit.

✠. Pofui adjutorium super potentem, & exaltavi electum de plebe mea : * Manus enim mea auxiliabitur ei. ✠. Inveni David servum meum; oleo sancto meo unxi eum. Manus enim.

Lectio vj.

Dum Mifsarum Solèmnia perageret, visa est viris pijs Columba è cælo delapsa humero ejus dextro insidens, alis extensis caput ejus velare, quo

quo significatum est, Spiritus sancti afflatu, non humanæ prudentiæ rationibus ipsum duci in Ecclesiæ regimine. Cum ab iniqui Henrici exercitu Romæ gravi obsidione premeretur, excitatum ab hostibus incendium signo Crucis extinxit. De ejus manu tandem à Roberto Guiscardo Duce Northmanno ereptus, Casinum se contulit; atque inde Salernum ad dedicandam Ecclesiam sancti Matthæi Apostoli contendit. Cum aliquando in ea Civitate sermonem habuisset ad populum ærumnis confectus in morbum incidit, quo se interiturum præcavit. Postréma morientis Gregorij verba fuerunt; Diléxi justitiam, & odivi iniquitatem, propterea morior in exilio. Innumerabilia sunt, quæ vel fortiter sustinuit, vel multis coactis in Urbe Synodis sapienter constituit, vir verè sanctus, criminum vindex, & acerrimus Ecclesiæ defen-

for. Exactis itaque in Pontificatu annis duodecim migravit in cælum anno salutis millésimo octogésimo quinto, pluribus in vita, & post mortem miraculis clarus, ejusque sacrum corpus in Cathedrali Basilica Salernitana est honorificè conditum.

✠. Iste est qui ante Deum magnas virtutes operatus est, & omnis terra doctrina ejus replèta est: * Ipse intercèdat pro peccatis omnium populorum. ✠. Iste est qui contempnit vitam mundi, & pervenit ad cælestia regna. Ipse intercèdat. Gloria Patri. Ipse.

In tertio Nocturno, Homilia S. Hilarij Episcopi in Evangelium. Vigilâte, quia nescitis, ut in Communi Confessoris Pontificis.

Nona Lectio de S. Urbano Papa & martyre.

Missæ. Sacerdotes. ut in Communi Confessoris Pontificis, Oratio. Deus in te sperantium, ut suprâ.



Sanctissimus Dominus Noster BENEDICTUS
 XIII. benignè indulfit, atque concessit, ut
 Officium sancti Gregorij Papæ VII. aliàs à Sacra
 Rituum Congregatione die 19. Augusti 1719. cum
 Lectionibus secundi Nocturni, & Oratione propriis
 pro universo Ordine Benedictino re-visum, &
 approbatum, imposterum ab omnibus Christi fide-
 libus utriusque sexus tam Sacularibus, quàm Re-
 gularibus, qui ad Horas Canonicas tenentur, Die
 25. Maij sub ritu Duplici recitari, & Missa res-
 pectivè celebrari debeat, ac ità in Bre-viario, ac
 Missali Romano apponi mandavit. Die 25. Septem-
 bris. 1728.

N. Cardinalis Coscia.

Loco  Sigilli.

N. M. Tedeschi Archiepiscopus Apamenus

Sacra Rituum Congregat. Secretarius.